

INUIT ATAQATIGIIT

Inatsisartuni

17. juli 2019



UKA2019/136

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq saqqummiuppara:

Eqqumiitsuliornermik suliaqartut atugaannik qanoq ililluta oqilisaassisinnaanerput pillugu apeqquteqaat aallaavigalugu oqallinnissamik siunnersuut.

(Inatsisartunut Ilaasortaqaq Peter P. Olsen, Inuit Ataqatigiit)

Eqqumiitsuliornerup silarsuaata iluani suliaqartutut taaneqartartut ilaatigut makkuupput: Nipilersortartut, atuakkiortut, isiginnaartitsisartut, filmiliortut, assiliisartut, qalipaasartut, qiperuisartut, qitittartut, allallu pinngorartitsinikkut nutaalianik suliaqartartut.

Eqqumiitsuliornerup inuussutissarsiutitut, siunissamilu nunatsinni, nunattalu avataani niivernikkut tunisassiatut, nunattalu avammut nittarsaanneqarneranut iluaqutaanerulersinneqarnissaa pingaaruteqarpoq. Taamaammat eqqumiitsuliortut atugaasa oqilisaavigineqarnissaat pillugu oqallittuarnissarput pingaaruteqartuaannarpoq.

Nunatsinni eqqumiitsuliornikkut assigiinngisitaartunik piginnaasalippassuit amerlaqaat. Sumulluunniillu qiviarutta nunaqqatitta akornanni eqqumiitsuliornikkut pilersitaannik takusassaqartuurtarput, tusaasaqartuurtarlutaluunniit. Immaqa ulluinnarni tamakku eqqarsaatigineq ajoraluarlugit taammaattoq annertuupilorujussuarmik sunniuteqartarput.

Eqqumiitsuliorneq tassaannaangilaq sunngiffimmi suliaqarneq, kisiannili aamma tassaavoq inuussutissarsiutaalluarsinnaasoq tamatta atuagarsorlulalu aalisartuusinnaanginnatta.

Nipilersortartoq assersuutigissagutsigu, nipilersortartoq akunnerparujussuit, inuunerminilu annerpaartarujussua sungiusarnermut atoreersimallugu appisimaariarpoq atortorissaarutit nammineq pigisani pitsaasut aningaasarpassuarnillu nalillit nassarlugit.

Angalavoq, timmisartorpoq, nerisaqarpoq, nipilersorfigisassaani inupparujussuit suleqataapput, qullilerisut, nipilerisut, matulerisut, tuniniaasut, inuppassuillu akiliillutik tusarnaariarlutik. Naggataatigullu akunnittarfimmut innariartorluni.

Appisimaartoqarnissaanut inupparujussuit sulisinneqarput, tamavimmillu akileraartarput, aningaasallu ikigisassaangitsut taamaaliornikkut kaaviiartinneqartarput. Nipilersortartorlu nuannisartitsereerluni angerlartarpoq aaqqissuussinermi aningaasat kaaviiartissimasami ilaannai akissarsiarisimallugit. Taakkulu qaavatigut aamma akileraarutigalugit.

Naluneqangitsutut nunatsinni angallannikkut akit nunarsuarmi appasinnerpaanut ilaangillat. Assersuutigalugu Nuummiit Upernavimmut siumut utimullu inummut ataatsimut minnerpaamik 10.200 koruuneqarpoq. Nipilersortartut tallimaakkajuttarput amerlanerusinnaallutilli.

Inuit tallimat Upernavimmut tikisinniaaraanni katillugu 51.000 koruunit. Ineqarnermut minnerpaamik ullut sisamat inuit tallimat 16.000 koruunit. Nerisaqarneq 6.000 koruunit. Nipilersortartut akissarsiassaak katillugu 25.000 koruunit. Nipilersorfissamik attartorneq 5.000 koruunit. Aningaasartuutissat katillugit minnerpaamik: 103.000 koruunit.

Nunatsinni inuppassuunngilavut aamma Upernavimmi inuppassuaqanngilaq. Kina akissaqarpa 103.000 koruuninik akiliilluni nipilersortartunik tikisitsinissamut?

Akileraartarnikkut, ilanngaatitigulluunniit aaqqiisoqarsinnaanerpa? Imaluunniit immikkut angallannikkut tapiissutaasinnaasumik periarfissiissanerpugut?

Assersuutigiinnarlugu savalimmiuni inuussutissarsiutigalugu nipilersortartut imerniartarfinni nipilersortartut akileraartinneqarneq ajorput.

Nunatsinni pissutsinut eqqumiitsuliortunut aporaatsitsisuni annerpaaq tassaavoq internet.

Eqqumiitsulioriaatsit eqqugaanerusartut uku pingasut tassapput; Atuakkiorneq, filmiliorneq aamma nipilersorneq.

Internetimut tulluussakkamik eqqumiitsuliornikkut tapiissutit suliareqqissanerpagut ullutsinnut naleqquttunngorlugit? Taamaalillutalu nunarput eqqumiitsuliornikkut avammut nittarsarsinnaangorlutigu?

Eqqumiitsuliorneq politikkikkut katitigaanerup iluani inuussutissarsiutaasinnaasutut akilersinnaangortittariaqarparput, nukerujussuaq pigeriigarput atorluarnerulertariaqarparput.

Akileraartarnikkut ilanngaatitigulluunniit oqilisaaffigigutsigit inuussutissarsiutaanerulernissaa ammaatissavarput.

Angallannikkut, suliaqarnermullu tunngasunik tapiissutit aaqqissuuteqqikkutsigit suliaqarnerulernissaat ammaatissavarput.

Eqqumiitsuliornikkut internetip eqqumiitsuliortumut nalikillisitsisarnera nalimmassaavigigutsigu periarfissarujussuarmik ammaassissaaq nunatta iluani nunattalu avataanut.

Qaffasinnerusumik eqqumiitsulianik pilersitsisinnaanngoqqulluta, eqqumiitsuliornikkut ilinniarfiit assigiinngitsut tapersensorlugit inerisaavigiuartigit allisarlugillu.

Taava pisinnaasortatta periafissaat pitsanngorsartariaqarpagut. Inuit Ataqatigiinnit pitsaasumik eqqumiitsuliorneq eqqumiitsuliortunut akilersinnaanerulersitsissalluta suleqataarusuppugut.

Eqqumiitsuliorneq aqqutigalugu nunarput avammut nittarsaalluarsinnaasariaqarparput.

Nuannersumik uummaarissumik angusaqarfiulluartumillu oqallittoqarnissaanik kissaassillunga

Qujanaq